

Saluc ai ladins

Cie iel pa de plu bel che vester leprò pra i Juesc Olimpics!?
Carolina Kostner de Urtijëi coche portabandiera,
deberieda cun na bela grupa de atletes y atlec ladins de uni disziplina.
Y nce cun balarines y balarins dla valedes ladines



I balarins dla valedes ladines a Torino.

Juesc Olimpics/1 - Cëla iló! Amesa la delegazion taliana ite. "Saluc ai ladins". Mé una na scruta mustreda, danter d' autra scrites ite. Ma per i ladins che à cialà pro iel stat zeche de bel. I ladins se à mustrà al mond, a doi miliardes de persones che à cialà la zeremonia de giaurida tla televizion. Na gran emozion. La Gazzetta dello Sport a plata 2 y la Repubblica a plata 3 auza ora positivamënter chësta prejënza dla mendranza. Na maniera de fé mpue' ora dl protocol, ma daujin ala jënt, ala particulariteies dla popolazions.

L fova nce truep atlec ladins. De Gherdëina Michela Ponza che fej pea tl biatlon. Manfred y Manuela

Mölgg de Al Plan, Chiara Costazza de Poza de Fascia, Kristian Ghedina y Wendy Siorpaes de Cortina per l schi alpin. Meinhard Erlacher de Al Plan per l snowboard y Marion Posch de Colfosch y sun la half pipe Tania Detomas de Fascia. Per la garejeda sprint de pudejë a tecnica liedia l fascian Cristian Zorzi y Stefano Margoni, nce ël fascian, tla squadra taliana de hockey.

Carolina porta la bandiera

Y pona, Carolina Kostner. Portabandiera dla squadra taliana. Danora, blotiscima, cun si 19 ani.

Cun la gran bandiera tla mans. Se gudan l mumënt y la sëira, nscila coche l ti fova unì metù a cuer da mami Patrizia y tati Erwin. Nsciuna, na festa mundiela, naziunela, ma nce ladina. Cun i atlec olimpics y nce cun la delegazion ladina di balarins che à fat na bela gran paruda pra la zeremonia de giaurida, bëndebot tl prim, tl Segmënt dla Elpes. Na marueia, chëla de pudëi ti cialé ala lingia longia de jëunes y jëuni che balova n walzer, a trëicher, furnii cun l bel guant tipich de nosc raion dolomitich. (dl)

Autri articuli sun plata 4 y 5.